



Die Aabrennte Fasnacht 2016

Die Basler Buude - meint me z China - passi ins Portfolio,
Und het schnäll 44 Mille us dr Portokasse gnoo.

Als gleins Bonus-Gschänggli gäbte mir, denn wär do ändlig Rue,
Für 80 Millione äxtra s Baselbiet drzue.

Freue Sie sich au ufs Grundyykomme ganz bedingigslos?
Dr ganzi Daag im Eglisee und troztdäm gits e Huffe Moos.
Numme pläuschle und nüt leischte. Glaube Sii das könnti goo?
Möglig isch es! Well dr Morin machts sit zwölf Joor so.

Uffen, aaben, uffen, aaben, jede Daag und jedi Nacht,
Yynen, uusen, yynen, uusen, yynen, uusen, dass es gracht.
Yynen, uusen, uffen, aabe! Mir wänn wüsse wie zur Höll,
Soone Poller troztdäm dr Verkehr beruhige söll?

Im Sennehemmli freut sich d SVP über dr zweiti Sitz,
Und mit dr Politik goots abwärts wien e Ski-Fahrt in dr Schwiiz.
Dört wird s Ys so langsam dünn und es lauft au scho lang nümme rund,
Well an allnen Egge s Bruune langsam füüre kunnt.

Wo dr Kevin sich am Kiosk gärn e Branchli kaufe will,
Für fünf Schtutz mit em ne Evian, jo do hett er nit so vill.
Do seit si Fründ dr Robi zuen iim: "Los jetzt, Alte, pass mol uf:
Kauf dir doch e Mars, do hetts jo schyyns au Wasser druff."

Dr Donald Trump macht Riisewirbel und me findets unerhöört,
Uns kunnt dä Maa no rächt bekannt vor, mir sin drum nit so empöört.
E Riiseschnuure, vyll z vyll Schtutz und uf em Grind e Hoortupee,
Jä s isch klar, so Type woone suscht am Züürisee.

"Mer mache dicht!" das sagt man nicht, das Baaseldytsch syg abverheit,
Vor Schregg sin uns grad unsri Masggen in d Konfetti-Tüte gheit.
Und dr Eric Wäber meint, dä Spruch syg gstoole grad per see,
I bi nit dicht - das syg scho längschstens syy Sujet.

Klar, es isch en ärschte Notfall, wenn dr Scheich si Scheiche bricht.
Für dä Armi macht me drum in Klote gärn en Äxtraschicht.
Au d Rickli bricht dr linki Fuess, doch kunnt sii dorum nit in Not,
Well sii bekanntlig prinzipiell nit so uf Linki stoot.

Voller Stolz blagiert dr Winzer-Bundesroot Parmelin Guy:
"Die glyychi Qualiteet wie mi Partei hett also au mi Wyy."
Wenn das stimmt mit dem Verglych, jä also denn glaubsch besser draa,
Dass me die Pfütze nit emol zum Koche bruuche kaa.

Dr Hermann Göring isch kei Mörder, sondern e verkannts Genie,
Und statt in d Kische miesst dr Blatter nämmlig "Mann des Jahres" syy.
Und dr Köppel isch, wenn me die dritt Enthüllig au no miech,
Kei Nationalroot, sondern eifach nur e dumme Siech.

Mir hoffe seer, Si hänn zum Zmittag hüt kei Brootwurscht zue sich gnoo,
Es sin nit mir wo das verbiete, d WHO seit, s isch esoo.

Kei Salami, kei Pastrami, Mortadella löön mir syy,
Dr Deufel steggt nümme im Detail, nei är sitzt in dr Charcuterie.
D Bluetwurscht, die git sicher Hochdrugg, d Lääberwurscht git Nierestei,
Di Lääbe nimmt dangg Wurscht nit nur ei Änd, nei mängmol sogar zwei.
Dasch schlychends Gift zwüsche zwei Zipfel, wie mir jetzt erkenne mien,
Mir schiggen alle Würschtli heim, nach Frankfurt, Lyon oder Wien.
Und wenn so Würschtli denn am Baanhoof stöön, das sölls jo wirgglig gää,
Söll me jetzt zur Sicherheit no ne Armlengi Abstand nää.

Au in dr Schwizer-Wurschtpartei, herrsche drum Panik, Wuet und Fruscht,
Statt "Mir isch Wurscht" seit jetzt dr Muurer nur no lysslig "Ha kei Luscht".
In dr Leitig het me sich s us Gsundheitsgründe z Härze gnoo,
Die ganze Brootwurscht drätte zrugg, und numme d Röschi isch no doo.
Und bi Telebasel do verspricht s Tamara ganz bedruggt,
Und unter Drääne dass si iire Gescht jetzt nümme uf d Pelle ruggt.
Und me loot verlutte und mir freuen uns scho uf die Rue,
Es gääb dr Wattewyl jetzt niene me sy Sämff drzue.

**Fir und vo liebe Frind ischs Zündhölzli/
Brandloch e wunderbaari Fasnachtsbaiz
mitten im Härz vo dr Frau Fasnacht am
Rhysprung 1. Göffnet isch dä sicheri
Haafe am Morgestraich und däglig ab
de fünfe. Lueged also yyne uf dr aint
oder ander spitze Bangg!**

www.aabrennte.com